



国家出版基金项目  
NATIONAL PUBLICATION FOUNDATION

# 民國史料叢刊

續編

0898

孫燕京 張研 主編

社會·社會成員

華僑參政權全案  
華僑教育會議報告書



大象出版社

# 民國史料叢刊

續編  
0898

孫燕京 張研 主編  
社會·社會成員

華僑參政權全案  
華僑教育會議報告書



大象出版社

劉士木編輯

華僑參政權全案



影贈生先強克貴



影贈生先山中黎



影贈生先閻延譚



影贈生先芳廷伍



發起要求華僑參政權者  
僑界偉人



謝碧田先生肖像

# 謝君碧田偉績

長沙張克恭

謝君碧田者。粵之梅縣人也。任俠好義。具古高士風。十稔以前。懷抱革命宗旨。以清政府網羅四張。抑鬱不得發。遂去而之海外。灌輸革命思潮。以光復祖國。爲惟一職志。華僑聞而興起者。踵相接焉。有亞齊者。南洋群島之一部也。地處偏隅。風氣閉塞。是時海外各埠皆有黨人蹤跡。亞屬獨付闕如。蓋猶是鄙野之區。民智未啓。不足與言更始也。君聞而憫之。特遊其地。與土著謀興學事。無和之者。君遂慨然引爲己責。盡出所有貲產。披荆斬棘。慘澹經營。卒創一校。顏曰圖強朝夕。教授孜孜不倦。數年之間。齊屬十餘埠學校書報社蔚然林立。至今日盛皆斯校影響之功也。武漢肇義。君聞信。語人曰。時機已熟。惟視吾人後援之力如何耳。卽馳赴各埠籌款。以謀廣州之響應。無何。廣福二州義旗聯舉。東南半壁盡易漢幟。喜音疊至。僑民額手歡呼。以爲得見天日矣。君遂與同志謀。


襄助國內統一事業。羣舉君爲蘇門答臘亞齊代表歸國。與革命功人組織臨時政府於南京。共籌北伐方策。會南北和議告成。不血刃而全局底定。是役也。爲時不過百餘日。犧牲之代價較之法美往事。特東雲一鱗耳。而所得效果。則未遑多讓。苟非賴華僑之實力。助其聲援。成功未必若斯之速。稽勳行賞。推海外同胞爲最矣。君以其功績不可泯。且共和國民不當以遠處而見遺。遂盡力上書參議院。要求華僑代議權。屢格於非議。百折不回。請願益力。與華僑聯合會諸同志函電交爭。卒得直。乃之上海。專營會務。意謂僑民既享有公權。則必有其對待之義務。斯會之設。蓋在保護華僑。集羣力興實業。謀祖國富強之基。僑民之來歸者。至是乃有所棲止。咸得其所焉。

克恭曰。革命功成。實賴民氣。乳臭小兒貪天之功。受殊榮膺上賞者。斗量車載。君以一身居海外。締造艱辛。十數年如一日。功成身退。未嘗受一日之榮。獲不

次之。賞且盡。力社會事業。方未有已。以視今之自命爲功狗。忝居高位厚祿者。其相去豈霄壤哉。吁。謝君眞人傑矣。余聞劉君士木道其事而敬之。爰泚筆爲之傳。雖文不足以傳君。亦存其實之意爾。



華僑聯合歡迎代表團攝影



## 序一

天生蒸民。有物有則。人類事物之繁。莫不有法制以爲之律令。所以完其秩序而導其指歸也。一夫之不獲一物之未安。則此法制之精神終有未備。故作法必出於人類之公意。準於事物之原理。反是則求其行之不敝。猶且不可遑論。收實效垂久遠哉。此共和國民必持政柄之所由來矣。華僑中國之民也。中國既建共和。隸華籍者悉可參政。又何判乎海內外。其靳而不予者。忸怩外人之成見。不識變通是之謂陋。主張予之者。慕僑界之功績。視爲報酬。是之謂鄙。鄙與陋皆非國民之所宜出也。謝子碧田有鑒於斯。竭智盡忠。爲僑民請命百折不撓。卒竟其志。華僑於是得參政矣。共和於是得完成矣。事後劉子士木爲搜集斯案之事實。都爲一篇。以示僑民。余乃本其意而作序。時民國二年元月十五日也。長沙張克恭。



## 序二

盎格魯撒克遜人足跡所至皆挾其固有之風尚而自成一種社會經營海外屬地亦多胚胎於母國而能變通盡宜故日月之所照臨莫不有其國徽飄揚亦卽其國力所充至而自治臻完美之域也中國專制遞遷數千載獨夫端拱羣僚委蛇黔首讐伏了無生氣寧有遠圖雖國家全盛時代四方藩屬苟朝貢之典罔缺已泰朕自足殖民事功未嘗學問儒者侈談忠孝羞言實利物產礦質棄置滿地而人民生計日絀弱者死溝壑强者淪異國手足胼胝畢生劬勞畜妻子長田宅久之族姓蕃衍亦幾幾自成一種社會朕皆治於人而不能治人故終以僑名而不能爲其地之主人翁朕國力不競之故非知識有所未逮也蓋其人生長海外親被泰西文化教養學術與彼都士夫埒祖國學者視之瞠乎其後而敦厚樸誠不染氣習則遠過內地復善治生產百年來休養生息

積金累巨萬者所在有之。且皆惓惓不忘祖國。革命諸子與實業界之得其資助者。尤難悉數。光復以還。就吾邑設華僑聯合會。互通聲氣。合力爭參政權。卒適得之。夫國家之興替。繫乎人才之盛衰。亂必繇官邪。治必繇政舉。政舉尤貴乎立法之善。其權皆議員操之。方今中國第一次國會行將成立。華僑才士亦將聯翩而入。爲祖國操立法權矣。猗與休哉。予曷幸而獲躬觀其盛也邪。廣東劉君士木。亦華僑中之傑出才也。篤誠懇摯。英年績學。勞心力於祖國者。亦積有歲月矣。頃萃華僑參政權各文牘。旁及報章論議輯爲一編。題曰華僑參政權全案。將刊而行。世以見華僑得此之不易云。於戲。華僑中不少奇才異能之士。苟人人發憤爲祖國盡力。它日國勢既強。安知不能駕盎格魯撒克遜人而上之乎。

中華民國二年一月二十二日

上海

新盒主人周樹奎

桂笙父序

### 序三

僑民去海南萬里。爲宗國光革命諸君子。逋亡蒞斯邦。則率友族。簞食壺漿。以迎。走相告曰。是將出其俊才。宏力拏龍伏虎。以恢國魂者。吾儕望之久矣。一朝風雲起。義師上陸。戰鎮南。戰惠州。戰廣州。戰武漢。海外豪俊之士。裹糧景從。前仆後興。遂光華夏。全國慕義。強仁之流。皆曰。僑民賢且義。宜令長扶顛危。僑民亦慨然曰。塲塲神州。吾既與賢豪共奠之矣。不可不共長治久安之。於是僑民請參與國政。臨時政府提交於參議院。參議院曰。可。乃著爲典制。年月日。民國第一次僑民國會議員選舉。舉行於京師。翩翩羣彥聯鑣以行。蓋數十年健忍忠愛之志。主是而始酬矣。行之日。劉君士木以華僑參政權全案示余。且言曰。民國大光。僑人士內渡以爭此參政權者。一年於茲矣。宗國不少賢俊。士建著盛業。將粲然有爲。然智不厭複。得賢俊之士相與錯綜論究。間盡二三補偏救

敵之誠。或亦民國所當有乎。他日景運恢啓。爛然成章。憲法制定。綱維萬世。則革命而後世有君子。欲得僑民成績而睹之者。將弗貳於斯編焉。余讀其書。知僑民參與議院之歷史。詳且備。乃謹陳辭以序之。曰。

昔有東郭氏者。問晉獻公曰。草茅臣願請問國家之計。獻公辭之曰。肉食者已慮之矣。蠶食者尙何與焉。東郭氏曰。設肉食者一旦失計於廟堂之上。蠶食者寧能無肝膽塗地於中原之野耶。夫東郭氏處專制之世。尙不欲自棄其能。而况才智傑出手創民國之僑民耶。又况適當此共和之世耶。方今政府未固。外患頻仍。一不得當吾行。且肝膽塗地於中原之野。則所望於參與議院之羣公誠殷且大矣。諸君子勉之哉。詩曰。迨天之未陰雨。綢繆牖戶。又曰。天生蒸民。有物有則。民之秉彝。好是懿德。余將盥沐以祝之焉。

中華民國二年元月二十二日吳縣葉楚傖序

## 序四

言心之聲也。力之媒也。心有思。言傳之言。一發力隨之。故欲得民心。資民力。必先導之。使言得其言。則得其心。矣。得其心。斯得其力。矣。古之爲天下者。詢於芻蕘。謀及庶人。瞍賦矇誦。百工諫。庶人傳語。所汲汲求之民者。言而已。言達則心傾。心傾則力赴。以故國無反側。民樂爲用。泰西議院。深合唐虞三代之治。而其制特詳。日人效之。遂割我台灣。滅我琉球。攫奪我朝鮮。虔劉我滿洲。前清夢夢昧於天演之公例。戕民權。挫民氣。使豪傑之士。氣憤而不得伸。羈旅之衆。聲嘶而不能達。天怒人怨。君臣義絕。不得已而興革命之師。向使清能開言路。予民權。以公理治天下。則河山雖古。安得而亡之耶。民國成立。由專制而變共和。海內士夫。得伸言論。遂翹然以爲共和政體如是而已。嗟乎。獨不思海外數百萬神明胄。寄寓箱幘。結舌而無由自達於國家耶。於是謝君碧田。以代表名義。要